

याकूबं च्वःगु पौ म्हसीका

येशूया किजा याकूबं थ्व पौलय् रोमी साम्राज्यया थीथी शहरय् च्वनाच्च्वपि यहदी विश्वासीतयत् ख्रीष्टियन चालचलन गथे जुइमाः धकाः थीथी अतीं बियातःगु दु।

याकूबं थुकी तःमि, चीमि, जाँचय् लाकीगु, भिंगु चालचलन, ख्वाः स्वयाः ज्या यायेगु, विश्वास व ज्या, मेयात खःकथं छ्यलेगु, भिंगु व मभिंगु बुद्धि, ल्वापु, घमण्ड, क्वमिलु जुइगु, मेपिन्त दोष बीगु, तःधंछुइगु, सह यायेगु व प्रार्थनाया बारे ध्वाथुइकातःगु दु।

थ्व पौलय् विश्वास याःथे ज्या नं यानाक्यनेमाः धकाः बःबियातःगु दु।

धलः पौ

न्ह्यखँ १:१

विश्वास व बुद्धि १:२-८

चीमि व तःमि १:९-११

जाँचय् याःगु व जाँचय् लाःगु १:१२-१८

वचन न्यं थें यायेमाः १:१९-२७

ख्वाः स्वयाः ज्या याये मज्यू २:१-१३

विश्वास व ज्या २:१४-२६

मेयात लकय् हनेगु ३:१-१८

संसारयागु माया ४:१-५:६

मेमेगु अतीं ५:७-२०

याकूब

1 परमेश्वर व प्रभु येशू ख्रीष्टया दास याकूबयापाखें सारा संसारय् न्यंक वनाच्च्वपि इस्राएलीतयगु झिनिगू कुलयापि मनूतयत् ज्वजलपा।*

विश्वास व बुद्धि

2 दाजुकिजापि, छिमित न्ह्यागु कथंया दुःखकष्ट जू वसां लयताया च्वँ।

* 1:1 १:१ मती १३:५५; मर्क ६:३; प्रे १५:१३; गला १:१९

3 छायाधाःसा छिमिगु विश्वास जाँचय् यात धाःसा झन जक छिमिगु विश्वास बल्लाइ।

4 थुकथं विश्वास बल्लाकाः छिमिसं भरोसा तयाच्चनेगु त्वःते मते। अले जक छिपिं बल्लाइ, छुं नं मगाः मजुइक सिद्ध जुइ।

5 छिपिं सुयातं बुद्धि माःसा परमेश्वरयाके फवँ, अले वयकलं वयात माक्व बुद्धि बियादी। वयकलं फुक्कसित माक्व बुद्धि बियादी, छायाधाःसा वयकः सुयातं छुं बीत नुगः मस्याः।

6 छिमिसं वयकःयाके फवनेबलय् वयकलं बियादी धकाः विश्वास यायेमाः। परमेश्वरं बियादी ला बियामदी ला धकाः मनय् संका तये मज्यु। मनय् संका तयाः फवनीपिं मनूत फसं थुखे उखे याःगु समुद्रया लःद्रुम्बः थें जुइ।

7 अथे मनय् संका तया जुइमह मनूयात परमेश्वरं छुं हे बियादी मखु।

8 थथे दोमन जूमह मनूयागु ज्याखँ थातय् लाइ मखु।

तःमिपिं व चीमिपिं

9 संसारय् चिधंमह दाजु वा किजां परमेश्वरया न्ह्यःने तःधं जुइ दुगुलिइ छ्यं धस्वाकी।

10 अथे हे तःमिम्ह मनू नं चीमि जुइमाःगुलिइ लयता छायाधाःसा व इवाः जुयावनीगु खयलय् च्वंगु स्वां थें खः।

11 निभालं यानाः घाँय् फुक्कं गनावनी, स्वां इवाः जुयाः हायावनी। अले छतिं बांलाइ मखु। उकथं हे तःमिम्ह मनू नं छन्हू सिनावनी।*

12 दुःखकष्ट जुयाच्चंबलय् नं परमेश्वरयाके भरोसा तयाच्चंमह मनू धन्यमह खः। अथे दुःखकष्ट सीधुंकाः वयात परमेश्वरं वयकःयात माया याःपिन्त बी धकाः धयादीगु जीवनयागु श्रीपेच बियादी।

13 छुं गथे जुयाः सुं मनू जाँचय् लात धाःसा व मनुखं “परमेश्वरं जितः जाँचय् यात” धकाः धाये मते। छायाधाःसा मभिंगु खं परमेश्वरयात जाँचय् याये फइ मखु, अले परमेश्वरं नं सुयातं स्यकेत जाँचय् लाकादी मखु।

14 तर मनूयागु दुनुगलंनिसें हे मभिंगु बिचाः बुया वइ, अले मभिंगु ज्या याये मास्ति वयाः जाँचय् लाइ।

15 उकिं वयागु मतिइ बुयावःगु मभिंगु बिचाः बल्लाना वयाः वं पाप याइ। थथे वं पाप याना हे च्वन धाःसा व मनू सीधुंकाः नरकय् वनी।

16 यःपिं दाजुकिजापिं, थःमह थःत धोखा बी मते।

* 1:11 १:११ यशै ४०:६-७

17 फुक्क भिंगु भिंगु व सिद्धगु वरदान चवं, आकाशय् चवंगु फुक्क जः सृष्टि यानादीम्ह परमेश्वरपाखें वःगु खः। परमेश्वर गुबलें हिली मखु, वय्कः हिलिगु किचः थें नं मखु।

18 वय्कलं सृष्टि यानादीगु मध्ये न्हापांगु फल झीपि जुइ फयेमा धकाः सत्य वचनपाखें झीत थःम्हं ल्ययादीगु खः।

वचन न्यं थें यायेमाः

19 यःपि दाजुकिजापि, थ्व खँ ल्वःमंके मते – न्यनेगुलिइ चंख जु। बिचाः यानाः जक नवा, अप्वः तं पिकाये मते।

20 परमेश्वरया न्ह्यःने धर्मी जुया च्वनेत तं पिकया जुइ मज्यु।

21 मभिंगु बांमलाःगु ज्याखँ त्वःताछ्व। छिमित स्यनातःगु परमेश्वरयागु वचनयात दुनुगलय् तयाति। थ्व हे वचनं छिमित पाप याके मब्यसे पापं बचय् यानातये फु।

22 वचनयात न्यनेगु जक मखु, मानय् नं यायेगु या। थःम्हं थःत धोखा बी मते।

23 वचन न्यं थें मयाइम्ह मनु न्हाय्कनय् थःगु ख्वाः स्वइम्ह थें जुइ।

24 थज्याःम्ह मनुखं थःगु ख्वाः न्हाय्कनय् स्वतले खनी। अले हानं थःगु ख्वाः गय् च्वं धयागु खँ ल्वःमंका तुं छवइ।

25 सुनां मुक्ति बीगु सिद्धगु परमेश्वरयागु व्यवस्था ब्वनाः थुइकाः अथे हे याइ, अले ल्वःमंकी मखु, व हे धन्यम्ह खः। वं याःगु फुक्क ज्याय् परमेश्वरं आशिष बियादी।

26 धर्मीम्ह धकाः धया जुइम्ह मनुखं न्ह्यःने लाः थें नवाना जुइ मज्यु। न्ह्यःने लाः थें नवाना जुइम्ह मनुखं परमेश्वरयात मानय् याना जूगु सिति वनी। अले हानं थुकथं याना जूम्ह मनुखं थःम्हं थःत थगय् याइ।

27 परमेश्वर बाःयात यःगु भिंगु बांलाःगु धर्म ला मांबौ मदुपि मस्तयत व भाःत मदय् धुंक्पि मिसातयत दुःख जुइबलय् ग्वाहालि यायेगु, अले थ्व संसारय् मभिंगु ज्याखँ मयासें पवित्र जुयाच्वनेगु खः।

2

ख्वाः स्वयाः ज्या याये मज्यु

1 दाजुकिजापि, छिपि दकलय् तःधंम्ह झी प्रभु येशू ख्रीष्टयात विश्वास याःपि जुया नं छाया ख्वाः स्वयाः व्यवहार यायेगु यानागु?

2 सुं छम्ह मनु लुँयागु अंगू न्ह्याना: बांला:गु वसतं पुना: मण्डलीइ वल, अथे हे सुं छम्ह चीमिम्ह मनु नं भ्वाथ:गु वसतं पुना: वल धाय्का।

3 छिमिसं बांलाक वसतं पुनाव:म्ह मनुयात मानय् याना: “झासँ, थन दिसँ,” अले चीमिम्ह मनुयात हेपय् याना: “अन हे दनाच्चँ, अथवा बँय् फ्यतुना च्वँ” धका:

4 धाल धा:सा छिमिसं ख्वा: स्वया: ज्या या:गु जुइ। छिमिसं थथे ख्वा: स्वया: ज्या यात धा:सा छिमित मभिगु बिचा: तया: न्याय या:गु द्रुपं जुइ।

5 य:पिं दाजुकिजापिं, जिं धयागु खँ न्यँ – संसारय् चीमिपिन्त हे परमेश्वरं विश्वासय् त:मि यायेत व वयक:यात माया या:पिन्त दुकाये धका: धयादीगु राज्य्य दुकायेत ल्ययादीगु मखु ला?

6 तर छिमिसं ला चीमिपिन्त हे हेला यानाच्चन। छिमित त्यला त:पिं सु? त:मिपिं हे मखु ला? छिमित अदालतय् यंकीपिं सु? त:मिपिं हे मखु ला?

7 अले हानं छिमित स:तादीम्ह हनेमा:म्ह प्रभुयागु नां बेइज्जत यायेत स्व:पिं नं त:मिपिं हे मखु ला?

8 ज:लाख:लातय्त नं थ:त थें माया यायेमा: धका: धर्मशास्त्रय् च्वयात:गु परमेश्वरया राज्ययागु व्यवस्था छिमिसं मानय् याना च्वंसा बां हे लात।*

9 मनूतय्गु ख्वा: स्वया: ज्या यात धा:सा छिमिसं पाप या:गु जुइ। अले छिमित व्यवस्था मानय् मया:पिं धका: दोषी ठहरय् याइ।

10 व्यवस्थाय् च्वंगु दक्व फुक्क मानय् याना: नं छगू जक द्रुंकल धा:सां व मनूखं व्यवस्था हे मानय् मया:गु ति जुइ।

11 “व्यभिचार याये मते” धका: धयादीम्हयसिनं हे “मनूतय्त स्याये मते” नं धयादीगु दु। सुनानं व्यभिचार मया: तर मनू स्यात धा:सा वं व्यवस्था मानय् मया:गु जुइ, अले व पापी जुइ।*

12 अयजूगुलि पापं छुतय् याइगु व्यवस्थां न्याय काये खपिं मनूतय्सं थें नवायेगु व ज्या यायेगु या।

13 छायाधा:सा परमेश्वरं न्याय यानादीबलय् दया माया मदुम्ह मनुयात दया माया यानादी मखु। दया माया दुपिं मनूतय्त दया माया हे क्यनादी।

विश्वास या:थें ज्या नं याना: क्यनेमा:

14 यःपिं दाजुकिजापिं, ख्रीष्टयात विश्वास यानाच्चनागु दु धकाः धया जुइम्ह मनुखं ज्या याना मक्यंसा, वं विश्वास याना जूगु छु ज्यालगय जुल? थज्याःगु विश्वासं वयागु उद्गार जुइ फइ ला?

15 पुनेत वसः मदुपिं, नये मखंपिं दाजुकिजापिं व तताकेहेपिं छिमिथाय् दु धायका।

16 “परमेश्वरं छिमित आशिष बियादीमा, अले बांलाक नया तिया जु” धकाः जक धयाः छिमिसं इमित माःगु नसा वसः बिया मछवल धाःसा छिमिगु विश्वास छु ज्यालगय जुल?

17 विश्वास याना थें ज्या नं यानाक्यने मफुसा वयागु विश्वास सीगु विश्वास जुइ।

18 सुनानं थथे धायेफु – “छंके विश्वास दु, जिके ज्या दु।” छं छुं हे मयासें विश्वास याना धकाः जितः क्यनेफु ला? तर जिं ज्यां हे जिगु विश्वास क्यने।

19 परमेश्वर छम्ह हे जक दु धकाः छं विश्वास याना च्वंसा, बां हे लात। भूतआत्मां नं थथे वय्कः छम्ह हे जक दु धकाः विश्वास याः, अले वय्कः खनाः ग्याः।

20 अय् मूर्ख, ख्रीष्टयात विश्वास याना जू थें ज्या याना मक्यनीम्ह मनुखं वय्कःयात विश्वास याःगु सिति वनी धकाः छन्त क्यनाबी माल ला?

21 झी तापाःबाज्या अब्राहाम गथे जुयाः धर्मी जुल, छं स्यू ला? थःकाय् इसहाकयात वेदीइ छाये त्यंगुलि हे मखु ला, व धर्मी जूगु?✧

22 छं गथे थुइके मफुगु? अब्राहामं विश्वास याः थें ज्या नं यानाक्यन। वं याःगु ज्यां हे ला खः नि, वयागु विश्वास सिद्ध जूगु।

23 थुकथं धर्मशास्त्रय च्वयातःगु थ्व खँ पूवन – “अब्राहामं परमेश्वरयात अथे विश्वास याःगुलि हे वयात धर्मीम्ह मनु धकाः धयादिला।” “अब्राहाम जिम्ह पासा खः” धकाः परमेश्वरं हे धयादिला।✧

24 विश्वास जक याना जुयां धर्मी जुइ मखु धकाः ला थुकिं हे सीदत नि। अयजुगुलि धर्मी जुइत विश्वास यायेगुयानापं ज्या नं यानाः क्यनेमाः।

25 अथे हे राहाब धाःम्ह छम्ह मिसा वेश्या नं देशयागु फुक्क खँ सीकेत वःपिं यहूदी मनुतयत बाय् बियाः बिसिके छवःगुलि हे ला खः नि धर्मी जूगु।✧

26 गथे प्राण मन्त धायेवं मनु सी, अथे हे ज्या याना मक्यंसा विश्वास नं सी।

✧ 2:21 २:२१ उत २२:१-१४

✧ 2:23 २:२३ उत १५:६; २ इति २०:७; यशै ४१:८

✧ 2:25 २:२५

3

मेयात लकय हनेमा:

1 यःपि दाजुकिजापि, अप्वः गुरु जुयाः जुइ मते। गुरु जुया जूपिन्त परमेश्वरं मेपिन्त स्वयाः कडा जुइक न्याय यानादी। 2 झी फुक्कसिनं अप्वः यानाः द्रुके यः। मद्रुकुसे नवाये फुम्ह मनु हे जक सिद्धम्ह जुइ। थज्याःम्ह मनुखं जक थःगु म्हयात लके हने फइ।

3 झीसं थःगु खँ मानय याकेत सलयागु म्हतुइ लगाम तथाबी, अले झीसं सलयात यःयःथाय यंके फइ।

4 अथे हे फसं न्ह्यानाच्चंगु ततःधंगु लःजहाजयात नं छगू चिचाधंगु कर्ण जक संकाः नं जहाज चले याइम्हयसिनं थः यःथाय यंके फु।

5 झीगु मे नं अथे हे खः। थ्व मे चिपु जूसां थ्वं ततःधंगु खँ ल्हानाः फुइँ याइ।

अले हानं छकुचा मिं यानाः ततःधंगु गुँ च्यानाः वने यः।

6 मे नं मि थें खः। थ्व झीगु म्हया मेमेगु म्हब्ब स्वयाः मभिगु म्हब्ब खः। थ्वं झीगु म्ह छम्हं स्यंकाबी। अले नरकयागु मि कयाः झीगु जीवनयात हे छवयकाबी।

7 मनूतयसं फुक्कसित तहलगय याये फु। इमिसं गुँइ च्वंपि पशुतयत्, इंगःतयत्, धिसय जुया जुइपि जन्तुतयत्, अले समुद्रय च्वंपि जीवजन्तुतयत् तकं तहलगय याये फु।

8 मेयात धाःसा सुनानं थौं तक लके याये मफुनि। थ्व तसकं मभिं, थ्वयात लके याये थाकु, अले थ्व बिखं जायाच्चनी।

9 थुकिं हे झीसं प्रभु परमेश्वर बाःयात सुवाः बीगु, अले थुकिं हे परमेश्वर थें च्वंक दयकातःपिं मनूतयत् सराः बीगु खः।

10 व हे छप्वाः म्हतुं सुवाः नं बीगु, अले सराः नं बीगु याइ। यःपि दाजुकिजापिं, थथे छता याये मते।

11 छगू हे बुंगाःचाय साःगु नं खायगु नं लः बुया वइ मखु।

12 दाजुकिजापिं, यःमरिमाय भद्राक्ष सइ ला? अले दाखमाय यःमरि सइ ला? चि सवाः वःगु बुंगाःचाय साःगु लः बुया वइ मखु।

भिगु व मभिगु बुद्धि

13 छिमिथाय परमेश्वरयागु वचन स्यने फुम्ह सुं बुद्धि दुम्ह मनु दु धयागु जूसा वं तःधं मजुसे बांलाःगु चालचलनयाम्ह जुयाः बांलाक ज्या यानाः क्येँ।

14 तर छिपिं नुगः मुइकाः स्वार्थी जुयाः तःधंछुया जुइ मते। थुकथं छिमिसं फताहा खँ ल्हानाः परमेश्वरयागु सत्ययात त्वपुइत स्वये मते।

15 थज्याःगु बुद्धि परमेश्वरपाखें वःगु मखु। थज्याःगु बुद्धि ला संसारं ब्यगू, अले शैतानपाखें वःगु खः।

16 गन नुगः मुइकीपिं थः यःथें यानाजुइपिं मनूत दइ, अन कचकच जक जुइ, अले मभिंगु न्ह्यागुं ज्या जुइ।

17 परमेश्वरपाखें दुगु बुद्धि पवित्र, शान्ति बीगु, क्वमिलु जुइगु, मिजासं जाःगु, दया दुगु व भिंगु फल बीगु जुइ। थ्व ख्वाः स्वयाः ज्या मयाइगु व दुयंगु जुइ।

18 शान्ति बीम्हयूसिनं मिलय् यायेगु ज्यां भिंगु फल सय्की।

4

संसारयागु माया काये मते

1 छिमिगु दथुइ ल्वापुरख्यापु गनं वल? मोजमज्जा यानाजुइगु बिचारं यानाः थथे जूगु मखु ला? थ्व इच्छा छिमिगु हे नुगलय् च्वंगु खः।

2 छिमिसं थःत यःगु चिजबिजया निंतिं मनू स्यायेत तकं लिफः स्वइ मखु। छिमिसं थःके मदुगु चिजबिजया लोभ याना जुइ, अले ल्वाणा जूसां कायेत स्वइ। छिमित माःगु चिजबिज छिमित दइ मखु, छायाधाःसा छिमिसं परमेश्वरयाके मफवं।

3 छिमिगु मति हे मभिं, उकिं फ्वंसां छिमित बियादी मखु, छायाधाःसा छिमिसं मोजमज्जा याना जुइत फ्वनी।

4 हे विश्वास त्वःतूपिं मनूत, संसारयात माया याइपिं परमेश्वरया शत्रु खः धकाः छिमिसं मस्यु ला? संसार नाप मिलय् जुइपिन्सं परमेश्वरयात शत्रु याइ।

5 परमेश्वरं झीत बियादीगु आत्मायात जक यय्क च्वनाच्वनेमाः धकाः धर्मशास्त्रय् च्वयातःगु खः।

6 परमेश्वरं अज्ज यक्व दया माया यानादी। धर्मशास्त्रय् थथे च्वयातःगु दु –

“परमेश्वरयात तःधंछुया जुइपिं मनूत मयः।”

चिधंछुया जुइपिं मनूतयत धाःसा

वय्कलं यक्व दया माया यानादी।”

7 उकिं छिमिसं वय्कलं धयादीगु खँ मानय् याना च्वँ। शैतानं धाःगु खँ मानय् याये मते, अले वं छिमित थी फइ मखु।

8 परमेश्वरया लिक्क वा, अले वय्कः नं छिमि लिक्क झायादी। हे पापीत, छिमिसं थःगु ल्हाः सिलाछ्व। हे दोमन यानाजुइपिं, छिमिसं थःगु नुगःयात श्दु या।

9 छिपिं नुगः मछिकाः ख्व, पिच्याना हा। छिमिगु न्हिगु सः ख्वःसलय् हिलावनेमा, अले छिमिगु लसता दुःखय् हिलावनेमा।

10 परमेश्वरया न्ह्यःने चिधं जु। अले जक छिमित वयकलं तःधंकादी।

कर्पिन्त दोष बी मते

11 दाजुकिजापि, सुयात नं मभिकाः खँ ल्हाः जुइ मते। सुं विश्वासी दाजुकिजायात सुनानं मभिकाः खँ ल्हात धाःसां, न्याय यात धाःसां, व मनुखं परमेश्वरयागु व्यवस्थायात हेला याःगु जुइ, अथवा न्याय याःगु जुइ। थुकथं छिमिसं परमेश्वरया व्यवस्थायात न्याय यात धाःसा छिपिं वयकःया व्यवस्था मानय् याइपि मखु बरु छिपिं ला न्याय याइपि हे जुल।

12 व्यवस्था बियादीम्ह व न्याय यानादीम्ह परमेश्वर जक खः। वयकलं हे बचय् याये नं फु, अले नाश यानाछ्वये नं फु। उकिं कर्पिनिगु न्याय याइपि छिपिं सु खः?

तःधंछुइगु बांमलाः

13 छिमिसं थथे मतिइ तया जुइ – “थौसां कन्हयसां जिपिं फल्नागु शहरय् वनाः दच्छि ति च्वनाः ब्यापार यानाः धिबा कमय् याना हये।”☆ जिगु खँ न्यँ-

14 कन्हय् छु जुइ धकाः छिमिसं छुं नं मस्यू। छिमिगु जीवन छु हे खः धकाः? छिमिगु जिन्दगी खसु थें खः। छुं ई तक खने दइ, अले हानं तनावनी।

15 छिमिसं अथे मतिइ मतसे, बरु थथे मतिइ तयेमाःगु खः – “प्रभुयात यःसा, झी म्वानाच्वन धाःसा झीसं थथे अथे याये।”

16 तर छिमिसं तसकं तःधंछुयाः फुइँ यानाः खँ ल्हाना जुल। थथे फुइँ यानाजुइगु बांमलाः।

17 अयजूगुलि सीक सीकं नं भिंगु ज्याखँ मयाइम्ह मनूयात पाप लाइ।

5

तःमिपिन्त ख्याच्वः

1 हे तःमिपिं मनूत, जिगु खँ न्यँ – छिमित जू वयेत्यंगु कष्ट खनाः नुगः दायाः ह्यँयह्यँय ख्व।

2 छिमिगु धनसम्पत्ति छुंनं ज्यालगय् मजुइ धुकल। वसः नं पवसा ह्याः किलं नयेधुकल।

3 छिमिगु लुँ वहलय् फ्वसा ह्वये धुंकल। थथे फ्वसा ह्वःगु हे छिमिगु विरोधय् साक्षी जुइ। उकिं मिं थें छिमिगु ला नइतिनि। संसार फुनावने त्यंबलय् छिमिसं धनसम्पत्ति मुंकाच्चंगु दु।✧

4 छिमिसं बुँइ ज्या याःपिं मनूतय्त ज्याला हे मब्यूसे तयातःगु दु। छिमिसं अन्याय यात धकाः व ज्यामित हालाच्चंगु दु। अन्याय जुल धकाः इपिं हालाच्चंगु सः दकलय् तःधंम्ह व शक्ति दुम्ह प्रभु परमेश्वरं न्यनादीगु दु।✧

5 थ्व संसारय् छिमिसं मोजमज्जा यानाच्चंगु दु। न्याय याइबलय् सीगु दिनया लागि छिमिसं थःपिन्त ल्हंका च्वन।

6 भिंम्ह मनूयात छिमिसं मभिं धकाः स्याना छ्वत, अयनं वं अथे याये मते धकाः मपं।

दुःखकष्ट सह यानाच्चँ

7 दाजुकिजापि, प्रभु मझातले मन तया च्वँ। बाली लये दइगु आशां मनूतय्सं बाली पिनाः वा मवतले मन तयाः पियाच्च्वनी।

8 छिमिसं नं अथे हे मन तया च्वँ, थःगु नुगःयात बल्लाका च्वँ छायाधाःसा प्रभु याकनं हे झायादी।

9 दाजुकिजापि, छिपिं थःथवय् कचकच याना जुइ मते। अले जक परमेश्वरं छिमित भिपिं मनूत खः धकाः सजाँय बियादी मखु। स्व, मनूतय्त न्याय यानादीम्ह प्रभु याकनं हे झायादीत्यंगु दु।

10 दाजुकिजापि, वचन न्यकेत प्रभुं छ्वयाहयादीपिं अगमवक्तातय्गु खँ लुमंकी। इमित गुलि दुःखकष्ट जुल, अयनं इमिसं सह यानाच्च्वन।

11 इमिसं अथे सहयाना च्वने फुगुलि झीसं इमित “धन्य खः” धकाः धयाच्च्वना। अय्युब धाःम्ह मनूखं नं गथे लिपा तक सह यानाच्च्वन, अले प्रभुं हे वयात यक्व लिधंसा बियादीगु खँ नं छिमिसं स्यू। प्रभुयागु दया माया तःधं।✧

12 दाजुकिजापि, सुंनाप छुं कालबिल यायेत बाचा चिनेबलय् छिमिसं स्वर्ग व पृथ्वी, अथवा मेमेगु छुं नं नां कयाः पाफये मते। खःसा खः, अले मखुसा मखु जक धा। उकिं छिमित परमेश्वरं दोष बियादी मखु।✧

उसाँय् मदुम्हय्सिगु निरितिं प्रार्थना यायेगु

✧ 5:3 ५:२-३ मती ६:१९ ✧ 5:4 ५:४ व्य २४:१४-१५ ✧ 5:11 ५:११ अयू १:२१-२२; २:१०; भज १०३:८ ✧ 5:12 ५:१२ मती ५:३४-३७

13 छिपिं मध्ये सुनानं दुःखकष्ट सियाच्चंगु दुसा वं प्रार्थना या। छिपिं मध्ये सुं मनु तसकं लयताःसा वं भजन हा।

14 छिपिं मध्ये सुं मनु उसाँय् मदयाच्चंसा वं मण्डलीया थकालिपिन्त सःता हयाः प्रभुयागु नामं चिकनं बुके बिकाः प्रार्थना या।☆

15 परमेश्वरयात क्वात्तुक विश्वास यानाच्चंम्ह मनुयागु प्रार्थनां उसाँय् मदया च्वंम्हयसिगु ल्वय् लंकाबी। व मनुखं पाप हे याःगु जूसां वयात क्षमा यानादी।

16 अयजूगुलि छिमिसं थःपिन्सं यानागु पाप थःथवय् स्वीकार या, अले छम्हं मेम्हयसिगु नितिं प्रार्थना या। अथे याःसा छिमिगु ल्वय् लनावनी। धर्मींम्ह मनुखं याःगु प्रार्थना परमेश्वरं न्यनादी।

17 एलिया नं ला झीपि थें दुःखसुख फयाच्चंम्ह मनु खः नि। वा मवयेमा धकाः वं दुनुगलंनिसें प्रार्थना याःगुलि धात्थें हे स्वदँ व खुलातक पृथ्वीइ वा मवल।☆

18 लिपा हानं वं प्रार्थना यात, अले वा वल, अले पृथ्वीइ अन्न सल।☆

19 दाजुकिजापिं, छिपिं मध्ये सुनानं परमेश्वरयात त्वःता वंम्ह मनुयात हानं लिगना हल धाःसा तसकं हे बांलाइ।

20 थुकथं लिगना हःम्ह बांमलाःगु लँय् वनाच्चंम्ह मनुयात ला नरकं हे लित ब्वना हःगुति जुइ। अले छिमिसं यानाः वं याःगु फुक्क पाप नं परमेश्वरं क्षमा यानादी। थ्व खँ लुमंका ति।☆

☆ 5:14 ५:१४ मर्क ६:१३ ☆ 5:17 ५:१७ १ राज १७:१; १८:१ ☆ 5:18 ५:१८ १ राज १८:४२-४५

☆ 5:20 ५:२० हितो १०:१२; १ पत्र ४:८

Newar
Newar: Newar (Bible)

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 16 May 2025 from source files
dated 17 May 2025

838cc630-4ccf-5055-be45-10a98a141cc7